



至正集卷第六十一

元翰林承旨集賢大學士文忠魯國公諱

長樂郡 振鐸西

中

碑志 三首

元故中順大夫同知吉州路總管府事李公神道碑銘

并序

神道碑銘

公諱克忠字公謹姓李氏麓泉其自號也世居青州曾大父諱松
佩銀符山東東路樂鹽使大父諱楨知登州父諱顯四歲孤祖妣
張夫人挈以避難七歲族有為帥者携之入覲十四能騎射從帥
征淮藝日益進帥器之任以机警擢千夫長歷鄒滕尉河南等路
管民權府招集撫慰薄稅均役民德之始徙滕家焉事長夫人以
孝稱定鄉里義約以篤友助就養吉州遇徐徐故治也父老迎而
勞之有感泣者年七十八終于吉州官舍公幼穎悟自知力學業

成入京年甫二十八風紀詞垣交剡騰薦遂掾吏部朝廷遣使安南責以六事署安南國達魯花赤府知事偕哈兒撒海牙等行至元乙亥四月也時江南未平由臨洮渡河源經土蕃涉麗水過蕩車至牂牁逾南詔善鄣金盞水陸萬餘里至其國其人外雖恭而奉行未決移書責以大義諭以禍福取所貢土物歸土蕃梗途行雲南新開道丁丑夏始達上京上新臨問錄所經山川地里人物風土洎安南日歷國主問答上之賜金符擢奉訓大夫工部郎中兼計議俾再往使江南己平道廣西差近至即得其要領己卯三月達上京尋命復往庚辰四年挈其使黎仲佗奉表納款九月至京師而使事竣矣上嘉賞命為城守之長生者要一見卒不往僅除奉議大夫同知岳路州總管府事撫字幾摛恩威並著命民藏水初皆怨咨明年大疫得永既愈播之詠歌改秦州尹未暮擢中

順大夫海北廣東道提刑按察副使二親不能往委貲于弟俾奉甘旨甫一年穀寔大振思親即歸卸滕民羈滯嶺表者三十餘人給以食載之歸蓋將終養焉廟堂熟公之能若夫均大名傳驛之偏拯河間監法之弊決山東獄內之滯皆承攝而著績者也改同知吉州路總管府事慨然曰廬陵詩書人物之府舟便而吾親可偕此吾祿養時也抵郡寇盜方熾除攘之力居多茸即學新大成殿諸生紀之石樞府捐館哀毀踰礼奉柩歸滕廬于墓側親朋勸以母在始歸給從弟克明終其身安南盡出索金贖歸鄉人之陷于彼者平生急于行義類此壽五十六卒母朱夫人夢吞天星生公卒之夕有里星墮里門戛然有声配賈氏封龐西郡太君男女各一人男希顏廕南昌縣主簿附省縣治人難其仕而部剖決如流稅科先完民有訴兒為豪子毆死者傷有足指痕詰之曰彼豪子

著履來乎曰然曰著履安得有足指痕此必自跣而以誣人也訊
之具服辟行省掾從捕贛賊文機勞午處之裕如身親行間叢矢
命中錄勲賞一等擢袁州路經歷部使者薦其能遷鉛山州判官
署兼捕盜建亭曰簡聽昭盜弭也陞建寧路推官太君年邁不赴
築亭種植優游仰事者十年自號靜山太君服除除松江府判官
驗力定役吏不得舞智歲糧四十萬石痛刮宿弊致期預登省檄
封海舶漳州染癘歸陞奉訓大夫温台海運副千戶改太常太樂
署令俄以疾卒壽六十有二配張氏女適陳 孫男三人稷登泰
定丁卯進士第今監察御史稽廢永嘉縣尉補江浙省行人顏先
卒女一適孔適稷以 年 月 日遷權府而下葬滕縣 村之
原狀其世德請銘諸麗牲之石李氏自鹽使至御世史六世矣使
鹽籌而未啟登州啟而未廓權府廓而未營至公營矣而天復斬

年造請止此有家之隆世固有人事業之大有志之士不能無望
于公也愚謂公之樹立非炳炳較著者乎士生用世雖主乎學苟
無氣以克之所就亦淺近尔持撲被入直三省顧婢子語刺刺不
能休者滔滔也公視萬里如跬步三往返如須臾移安南書及為
詩八十韵皆激烈有氣主者要其一見將市恩耶抑求賄耶夫以
視萬里如跬步三往返如須臾之氣而肯枉己以徇人乎故雖五
品貳職亦足以行吾志苟一枉己崇秩華貫能直人乎愚聞有功
而食報未盡者在其子孫御史仕日起食公之未食者審矣繼御
史而迂續者尚有望焉銘曰

仙李擢根有大其植幾世幾年而華而實踳踳攝府邁種惟德故
老之思見于垂白使乎專對豪傑以之南交萬里不測之夷曰三
往返猶庭適達 帝曰汝能其俾長耶伊誰利惜乃窈天柄我君

我知我忠我職尔何人斯我尔私覲通守豈卑惟安所遇持節嶺
海飛霜暑路岵岵與思鄉僑偕去奉常承家惕若敬勤官不貴大
貴世有聞十年膝下萬事浮雲清廟祀樂吾可為矣俟焉長往曷
云能止嶄嶄諸孫巍科是報續聞無忝繼志尤恪身冠戔戔階是
日升奕世流澤益肆以宏瞻茲佳城松栢有光本支百世于予不
忘

故浙西道宣慰司都事贈嘉議大夫礼部尚書上輕車都
尉南陽郡侯鄧公神道碑銘并序

公諱澤字潤甫姓鄧氏其先世居渤海五世祖諱某仕金為保州
刺史始為蠡吾人皇元肇造國王木華里既定蠡吾公之祖諱德
以才傑見知國王載與俱歸更其名喝里哥承制為管領河間深
冀蠡民匠達魯花赤以卒父諱天瑞母康氏篤于義方之教故公

幼以孝謹稱于鄉里稍長讀書喜賓客善議論出入兵間習知兵
事每策厲自許慨然有用世之志至元十一年秋王師南伐五行
樞密院象推公才諳且在帷幄遂辟為掾省文檄調兵食綜理密
勿大為主將所知而襄樊以南望風俱附矣會朝廷新置使宣慰
黃州等路仍紘公為令史轉提控案牘未幾江南平授將仕郎黃
州錄事剛其勞論者少之而公不以屑意也十七年秋陳桂龍父
子反漳州閩中騷動廷議以公前在軍有能名擢為行中書左右
司都事佐其軍討平之比還進階承事郎改浙西道宣慰司都事
浙西宗故都民俗奢靡而士習巽與少年恣于乘時縱暴為奸利
者以什伯浮言胥動上下睽睽不相保公白上官悉取寘諸理而
于扶微與壞賑乏抑奢所以勞徠安輯之者尤汲汲焉于是齊民
始有蘇息之願矣二十二年宣慰司移治揚州公仍都事積勞當

遷方駕大用而病于杭遂不起享年三十有九寔是歲之九月廿三日也配張氏生子巨淵早卒次配朱氏生子巨川起家太子司經知印累遷為江浙行省都事入為太府度支監丞宣徽資政院判官遷福建都轉運鹽使朱夫人卒服除改江西權茶都運轉使國制三品既封二代公之父贈亞中大夫僉太常禮儀院事輕車都尉南陽郡侯妣康氏南陽郡夫人公嘉議大夫禮部尚書上輕車都尉南陽郡侯配張氏封如其姑公始卒時朱夫人年二十四巨川甫三歲守節自誓朝廷嘗旌其門年八十有賜幣至八十三歲以歿巨淵子三人曰洛河間路莫州稅使曰淇曰汾山東鹽司奏差巨川子五人洙大都留守司令史曰瀉國子生卒曰淮環衛官亦里好溫少闇赤曰沙國子生卒曰涇女二人長適河東廉訪司知事康墳次適蓀縣主簿陳崇本初公之歿也旅殯于杭後五

十有八年為至正二年七月十有七日始克返葬蟲吾先塋之次又六年巨川始以國子監丞李君黼之狀請為文刻其墓碑蓋巨川仕而益貧久而後克信其志也愚交巨川久義不得辭竊惟我世祖皇帝之定江南也網羅才俊盡屈群策以成混一之業小大不遺文武並用規摹弘遠矣然當是時元勲碩臣既皆功在彛常世昨茅土至于羈勒之勞尺寸之效依乘風雲致位通顯者比肩皆是也惟南陽公結髮從軍參預籌策再平冠暴綏靖南土使天假之年積業盛大其奇謀偉績必章章然有可稱者願位不酬能身殞名沒可悲矣夫雖然吾聞畜德晦善其施必達巨川踐敗中外声名蔚然由其子之所立而後公之所以積慶自躬者庶幾乎可睹也國家推恩泉壤侈以通侯之貴生也弗食沒而弥章然則刻銘牲石以示永久其誰曰不宜為之銘曰

惟鄧侯潤父蠡吾之英學書學劍久知名我師大介歎以與下馬
草檄如流星策勛倍爵得若驚南藩冠雲削屢平國有新舊典輕
重兵兒作姦吾是懲上官操割大軌經幕中畫諾寔發劓一朝使
節移廣度署維易地秩乃仍人期步武將青冥拾級甫七首厥登
三十有九丁頽齡令子克似業以宏起家斗食至專城南陽啟祚
世有承宜尔孫子方繩繩于躬不耀歿則榮惟畜不施抒也亨終
古有考在茲銘

故奉政大夫淮西江北道肅政廣訪使普顏公神道碑

尚書上輕車都尉追封恒山郡公諡正肅普顏公神道碑

銘并序

淮西江北道肅政廣訪使普顏公卒十一年至正龍集丁亥子中
書檢校官神保列行寔請易名制贈嘉議大夫礼部尚書上輕車

都尉追封恒山郡公諡正肅神保拜監察御史以愚同官中台謏
銘諸序乃序而銘之公諱普顏字君卿衛兀氏世家高昌曾大父
諱撒里阿塔贈集賢侍講學士中奉大夫護軍追封恒山郡公諡
孝懿大父諱普顏脫忽憐從太祖西征歿于軍贈資善大夫中書
左丞上護軍追封恒山郡公諡靖忠祖妣燕按迷失追封恒山郡
夫人父愛全受知 憲宗 莊聖太后尤礼之始命徙居鎮陽蓋
太后湯沐邑也贈榮祿大夫司徒柱國追封趙國公諡文靖公幼
敏達事北安王奏請悉屬之起家贛州路石城縣達魯花赤王封
邑也時寇荼五九張甚發民與戍卒扼其衝復石橋為賊所撤者
大疫躬督醫藥癘氣為息新公于社稷廟學部使者薦互事備五
年始代人不忍其去拜仁宗潛邸一見器之補東宮必閣赤典環
衛文籍既正大寶詔御史台除公御史繩糾無所避扭尔堅元帥

亦刺思等受賂承認往鞠正其罪正旦糾朝儀有二品立一品班
首亦使退不從劾罷之上行幸次大口問宰臣御史七品普顏散
官正八何也對曰初仕當尔乃特授承事郎擢僉河北河南道肅
政廣訪司事陞辭賜真蓋觀音像靈璧囚李殺劉繫獄獄卒族誣
其兄指授文致之獄得其寔釋其兄黜汚吏四百人舉才俊皆知
名移朔西道平江民岳武斬吏不能制論以法佛者白雲宗靈浙
元劇上其事朝廷為奪印罷之運使李英恃鹽法貪雲發其賊部
使者燦公詣行台行台復屬公寺中台上已行幸又馳至上京事
聞上深嘉賞酌酒親賜且命尚方賜食勅台臣中書擇能吏與本
道雜問罪人得而刺人魁矣改燕南道黜牧守之不才者英宗幸
定與五台皆以行部進見賜賚優渥衛士不敢肆暴上有命公力
奉為性河南道副使民熟公皆延頸以望信陽囚王蠻兒輩本農

家傭嘗往來邵良甫家邵值盜主者疑蠻兒輩庾死且二人察其
狀釋之俄得真盜光州改奉元路總管蓋罷吏騰謗聽者不察因
以劇邵中公期年化行以疾去移守吉安大旱民食廢本且盡至
有牽妻子水死者蓋公自作縣迄守二郡皆際大飢或勸分軍民
或力請于上或鬻爵募民身所不及分官往賑急甚水火為粥以
食不能自食築屋以居無所于歸救極荒之策試之所至禱雨輒
應奉元黍稷穗生槁節間前後全活不知其幾縣若二郡皆紀之
碑召入遷奉政大夫淮西江北道肅政廣訪使俄致仕歸後至元
丁丑八月三日卒于正寢九日塋真定東陽村先茔兄宗統法解
都魯迷失仲兄昌國州達魯花赤小雲石弟奎章閣大學士趙國
文穆公忽都魯篤尔弥寔娶衛兀氏封恒山郡夫人生子黃頭磨
承務郎同知諸暨州事再娶吳兒生神保國子生釋褐歷贊憲幕

有声由御史僉浙東海右道肅政廉訪司事女二人長適江南行
台治書侍御史本涯寔理次適江南行台監察御史野仙脫因孫
男三人女三人皆幼公起家滿邸試縣小割游刃有餘地文穆精
衛兀書位極清華上嘗閔公職不逮弟公矢辭誠恪益結主職知
要職華貫汨汨然來矣仕有崇庠然見諸事業者崇庠不與焉持
憲為賢使者作郡稱良二千石終始一致完節退歸所就豈淺淺
者哉自奉寡薄祿入賓祭之餘買田宅以處兄弟宗戚皆可銘者
也銘曰

高昌釐土育才孔殷旁行專落寔肇我文天造動闔用宏茲賁季
也操觚譯潤芸閣叔也崎嶇牛刀甫割天眷一顧頌沅注壑矯矯
持斧我豈人仇縱其賊蠹力罔有秋惟枉斯直惟當斯劉兩守大
郡厄丁其會號飢顛連形鵠色菜我不尔急是我尔創一道澄清
浩然賦歸左圖右書雍容燕娛子孫說說兄弟怡怡七十有五壽
斯謂得疏封惟宗易名有赫究其邁種猶稼而穡鎮土厚良蛇蟻
于恒繚以溥茫中為佳城我銘不泐百世是徵

至正集卷第六十二

元翰林承旨集賢大學士文忠魯國公許有壬著

碑志四首

故奉議大夫同知廣平路總管府事致仕羅公墓碑

愚昔班太史中書知管羌除掾羅吉請銘考廣平公碑時應制方
殷不果作至正戊子吉赴河南江北等處行中書省檢校官道相
迹其實請益恪愚早知廣平公復覩吉之能子也其又何辭遂次
其語曰羅氏上世名數繫歸德遷東平再遷鉅野曰忠娶張氏二
子長士廉馴行聞于里年二十二卒以子貴贈奉議大夫同知東
平路總管府事驍騎尉項城縣子配薛氏封項城縣君寔生廣平
公次士賢陽穀監當官配韓氏生文郁廣平公諱文煥字顯卿未
晬失怙恃祖父鞠之資稟犖犖異常兒人薄其孤奮勵自懲依母

族委已於學將東平郡庠會使者閱弟子員見解經融貫欵挈入京以未得祖命辭明年走謁使者乃掌環衛大官也間其名于上補環衛掾使者使西城征宋皆從歷天官征東行省及格除膠州判官甫至廟圮毀倡象新之有疑獄久不決司憲屬公果得情懷孟供億宗藩胥革並緣假不歸貫不酬公為錄事作甲乙帳去券剗白著之弊行用庫胥歲率徧擾應者必破產擇精識楮幣者十餘家以次應求輸稅於衛糶糧百費一生辨於己庾人不敢盜收歸有具獄盜金珠十餘人誅而疑之俄得真盜盡釋誣者小兒啼父母以公名怖之兒啼為止終更民立去思遺愛二碑世頌德路經歷擢山西江北道肅政廣訪司經歷簿領悉就繩尺目盲棄官受頌德風土家為改益都路經歷拜江南行台監察御史皆不能赴屏居十八年日復明起為吳橋尹望先聖克二邨公十哲繪兩

廡像獎學申教里愉戶懌縣西瀕御河歲潦嗷隄為堅築百餘里人今賴之惡予私標榜樹朋梗治罪其尤餘悉渙走民為立生祠改武崗路推官不赴晚更號獨慎老人以奉議大夫同知廣平路總管府事致仕後至正元五年乙卯二月二十三日卒于正寢壽八十有三四月廿一日塋邢台縣白圭鄉左賈村書按崗之原配嚴氏追封項城縣君繼張氏孫氏吉以世賞為汶上尉改淮東宣慰司照磨歷秋官西台掾除從仕郎武備寺提控案牘黃照磨擢掾中書秩承事即為今官嘗捧檄過邢懇欲留養力遣之居闕中忽心悸求歸公始捐館孝誠感觸庶幾黔婁乎大父洎東平府君俱塋鉅野合蔡里白塔堡公以地善寮謀遷未果吉恪遵遺訓而族人難之新阡但設東平府君名石公寤昭焉公幼孤能自樹立謂天厚之邪間關底僚中尼于目不大厥施謂薄之邪士一命可

行志若存郡司錄佐幕作邑民不能忘至紀碑立祠豈人力勉強
之所能致者哉况隆以壽復昌以嗣則天之厚之者厚矣銘曰
育材企成惟古其難父訓內迪師力外殫志苟不致猶暴而寒暄
茲顛木由藥自樹不根家學不資友助屢其甫童克深厥慮鼓勇
道遠間閩海隅一命及自我蓄遂據弛尔榜答倡吾詩書化流俗
易若鼓應枹惟懷附治民事孔棘獄枉以信兒孤以寂雙碑差哉
風雨不泐于郡于憲畫諾資成云故胡尼之遽蔽其明十有八年
復浚背井餘光所照桑榆有炳天恩閱勞紫服被躬壽八十三第
祿是叢于胥白圭泉深土厚以妥其靈以裕其後鉅野之澤寔惟
胚渾匪流有沱沂泗一原百尔來耳念茲弗諼

故亞中大夫福州路總管兼管内勸農事李公墓志銘

朝廷重守令之選廣辟舉之路嚴運及之條所以必其才也愚長
翰林法當辟一人以僉都水庸田司事李惟潤克尋擢福州路總
管兼管内勸農事請使及門乃至正戊子十二月二十八日卒於
正寢得年六十積階自承直郎六轉至亞中大夫猶子林奉行寔
請銘惟潤字仲舒其先臨邑人曾祖考諱成避地襄城徙穎之虹
橋再徙彰德家焉配張氏祖考諱衍兩試有司遂占儒籍經承事
郎河東山西道提刑按察司經歷配陳氏張氏考諱舉以公貴贈
朝散大夫秘書少監騎都尉隴西郡伯妣楊氏追封隴西郡君二
子長知善敬勤幹盡家用益裕次仲舒也宦學資給兄力居多由
新城縣儒學教諭轉桓州學正辟工部令史歷太禧宗禋院掾史
中書右司掾右司主兵刑掾執案牘得議可否會民有饋兄肉而
兄以它疾死者姊婿利妻弟之貲欲并吞之誣肉中有毒官逮弟
于理具獄上仲舒疑之詢得寔白都堂送所司信其在釋者圖形

祠之及格除通政院都事改中書省管勾架閣庫拜陝西行台監察御史陞本台都事擢僉都水庸田司事在通政公檄行河葺庾補居庸比驛戶具有成績為御史持大体急先務華州獄囚証承強盜讞而決遣西獄道士陷民為奴釋而民之與中山水佳勝水曹治焉未嘗事游娛退食杜門兀坐時乘驛舟視啟閉疏壅塞錢塘之役修捍尤有法居半年以病歸闕齋閣潔愍几陳古畫畫若將老焉福州閩海一都會家屏珠珍之所聚宣間蒞之風紀晚之釅司將之為牧守者視他郡為尤難朝廷挈以付之知其才有素也天下奪之吾知其不負朝廷矣福之民何其不幸耶愚在政府仲舒寔掾曹未嘗吏之也仲舒之賢故自可重况同里行乎其歸自西台吳中相從歡甚愚今年中台歸仲舒雖病尚能杖策相遇既而日華遂不起里閭舊游彫讎殆盡愚之悲蓋有甚于福民焉

明年二月廿九日祔安陽陽記原先室配賈氏繼張氏皆隴西郡君女一未笄銘曰

嗟嗟仲舒幼能讀祖父之書篋篋假途弗忘其儒不亟不徐六轉而為徹侯大夫令聞孔敷歎邁厥趨維蓄有潛維擴有法拮据卒瘁有嬰復孤其天也吁

故中議大夫同僉通政院事致仕王公墓志銘

公諱溥字亨道世為安陽蓋遵里人祖考諱玘贈奉議大夫駙騎尉湯陰縣子妣程氏老氏俱贈湯陰縣君考諱安仁將仕郎淮西宣慰司照磨贈中議大夫禮部侍郎上騎都尉太原郡伯妣馮氏贈太原郡君三子長諱溥仕至博平縣尹公仲也從父諱安貞終饒州路治中愚嘗銘其碑從其子今湖廣省郎中怵請也公一子明允纍然衰經泣且請曰從祖考得公銘先子不敢例而先世父

辱公厚先子亦公之厚也不孝忍死執事竊有望焉愚聞而悲之
尚何辭公幼穎敏習時務儒雅綠飾起家山南廣訪司書吏入掾
察院轉吏部令史流弊積久惟貨惟來而貧滯者譽之其守可知
已擢樞密掾陞提控俾總諸曹及格授供膳司丞改大都警巡院
使輦轂民號難治乃以能稱歷太禧宗禋院斷事官知事陞大都
路薊州知州撫民以寬繩吏以嚴歲凶請賑于朝全活者衆除京
畿都漕運判官謹出納明會計上官才之改知湖州路長與州抑
未敦本勵農典學終更歸以中議大夫同僉通政院事致仕國家
優札致仕者兩沾賜級至正乙丑十一月十八日卒享年七十有
三明年正月癸酉塋安陽司空村先塋娶裴氏封太原郡君明允
蔭礼部鑄印局使女一人適柴炭局使張吉公懸車後請封考妣
推蔭其子顯命公至畢事考終可無遺憾矣愚七歸鄉里銘其墓

者凡九人戊子之歸公適告老方喜得友而又為銘人之生世其
可悲也夫或者欲以崛起自足傲晚里閭淺之為丈夫也哉銘曰
吾里足賢有英而耆嗟我來暮及從其遺其遺幾人亦復徃長踞
踞予行邈邈予唱得朋又喪甫賀而弔彼蒼忽乘其究孰譙歸而
考終貴而及親况世其祿恂恂有人夷考其故亦曰多弟惟是懷
人亂我心曲佳城之陽洹水湯湯俾尔子孫枝百其昌

故正議大夫兵部尚書致仕楊公墓志銘

諸壻楊奎赴厥考尚書公喪且請志其擴以愚親而知公也乃述
其寔而序之公諱煥字文伯漢太尉震之後先世由華州徙躍州
再遷大梁金朔州順義軍節度判官我元贈中奉大夫護軍弘農郡
郡公諱鼎者高祖也贈昭文館大學士資德大夫上護軍弘農郡
公諱莊考諱國維者曾祖也贈榮祿大夫司徒柱國謚文懿諱澤

者祖也通奉大夫江浙行省叅知府政事贈宣忠守正奉德功臣
正奉大夫弗書叅知政事護軍弘農郡公謚忠肅諱敬直者父也
妣徒單氏封弘農郡夫人寔生公至元庚寅以儒家子宿衛春宮
奉隆禧太后旨入學肄習釋褐從仕卽陽擢縣尹避祖諱辭改通
事舍人轉太廟署令忠肅公疾棄官侍湯藥者八年管勾河南行
省承發架閣庫歷籍田署令岬南台監察御史移西台僉江東湖
北浙東三道廣訪司事忠肅公年高請便養授河南行省員外卽
尋升正卽忠肅公薨廬墓卽三年年監察御史出副閩海道移湖
南又移廣西擢江西推茶都轉運使居官五月年始六十八卽請
休致以正議大夫兵部尚書致仕至正九年己丑六月三日卒於
揚州正寢享年七十有五明年三月 日塋祥符縣魏陵岡伯俞
村先塋配郭氏先公卒繼完顏氏皆封弘農郡夫人五子長圭奉

議大夫知湘潭州郭夫人出次奎次堅完顏夫人出也次莊次塏
女四人適永康簿吳瑞平原簿史翬繁昌尉李構留司掾鄧洙孫
男四鑄鐸七十三壽慶女二曾孫男一添壽公自為小官知無不
為為無不盡侍儀贊禮成廟嘉賞有衣帽之賜莞庫河南告飢廟
堂不避大臣之怒至得而聖卒如所請藉田請植柳為薪免伐桑
棗召見便殿有酒醴金綺之賜為御史南台糾副僉不法者四人
方面貪暴者一人答逐憲吏之誤罷人官者二人其分司官亦自
劾而去西台按雲南省臣賊悉置之法中台言官冗吏弊民貪財
嘉切中時弊狂童馬馬沙為指揮聚惡以樹標榜妄肆笞箠治其
党四十餘人分臺上京賜楮幣中統五千緡白金五十兩金龍幣
一弓矢刀鞍有差臺檄行水開水門造石壩以泄蔡河夏秋之潦
復舊碑六導蔡水入圭河增新碑二以達于陳民賴其利僉憲江

東發池州監郡之貪復太平西湖之灌溉撤采石橋之阻搃移湖北適蜀有警守阨塞鎖瞿塘不殺蜀使以逢其怒而省臣有蹈此幾致狼狽者象始服公之明龍陽建三皇廟修夫子廟覽漢陽儒學宮塲百餘丈其不專于政而先于教者乎八閩貪吏麗法者幾百人胥隸三百人徵賦楮幣餘段皆以千計平反林信天之寃出南安尉之誣湖南徐萬六飢民為盜吏當之以強力争得不死廣西用兵連歲疫癘方作黜貪暴撫彫起平寃抑雨雪大作民疾用甦推茗歲課未登剔蠹利商未幾告足而歸志浩然矣築室惟揚賓至觴詠終日談朝廷典故先正格言故家原系疊疊有據初忠肅公之在惟揚也愚為轉運使每休沐必省之公有浙東之行愚以忠肅年高諷之公曰俟到婺將求汴省幕職因奉老人歸鄉里愚竊不然後果得汴幕至汴踰戚忠肅公始薨嗚呼人之所欲天必

從之况為忠孝者乎然事機之巧鮮有是若者愚嘗舉似士大夫以為美談而亦論愛日喜惧不可盡望其如公也銘曰
青宮暫御擇罔不欽繫儒家子恂恂其心圓之賢閔植之士林由璞而玉由州而金是宜達財倍軼恒品釋褐出宰受敢不審家諱有嫌稱謂斯喋抗辭既愨休命為寢君子返厚器識可覘主以剛毅濟以柔護三台司察六道分廣細民其蘇渠魁則殲推利不苛議刑不濫天報宜豐存沒無憾嗣來汴公原逢泉極導而勿墜我銘尔鑒

至正集卷第六十三

元翰林承旨集賢大學士文忠魯國公許有壬著

碑志五首

武昌路武當萬壽崇寧宮碑銘有序

武當均州山先名太和道流謂其峻極秀絕非玄武神不足當故
更名武當勝國端平甲午兵搖襄漢均民走鄂深神德不能忘鳴
于官行武當祠于鄂為冲霄壇制使孟珙禱于神有齊安之捷易
壇為觀蓋復崇寧額也我元至元庚寅升武當萬壽崇寧宮地
據雄峻鶴山亘其後大江朝其前雲閣扁深石磴梯危大殿高堂
傑閣危亭長廊縈帶通樓環匝百神胥宇羽流栖息壇壝鼓鐘學
館庖會輶輶錯布仰觀樓閣玲瓏在五雲中絕頂俯瞰萬間鱗集
煙藹蔽虧若洞庭觀波濤目為之眩而山川形勝闐闐盛麗金碧

丹雘高下相輝玉京十二樓不得而見之此亦人境之洞天也秦
定甲子又改作玉皇閣高凡十二丈深廣相若由甲午迄至正甲
申一百一十一年壇而觀觀而宮若葺故若建新幾人幾日幾工
幾木而甲申之五月戊午掃于一炬洞真明道冲妙真人住持提
點兼領諸宮觀事羅君大震職宮事餘四十年勞瘁已至時當弛
擔而彼所謂劫運乃丁其會常情體解氣沮方偕其徒曹大坤等
以已貲率衆力任其復而威頓王寔鎮是邦主贊尤恪重起兩廡
甲子樓三十一間以其下內半為雲房歲丁亥三清殿成深廣十
尋高九尺加舊制三之一又建玄上天帝殿聖象侍從供器靡不
備功而又作亭礮石以紀給紵運机為歲以待繪穰餘凡締構日
以就緒矣昔閣之成嘗屬予記亡友玄教太宗師閑閑吳公亦屢
為言時待罪政府多事因循遂至今日乃己丑八月書來告其撥

捨煨燼有成仍命予志夫所謂劫運者吾儒有所謂數也天地有
且數人力之盛神靈之托有能出天地之外者乎其成其毀有不
必究者己玄武之祠昉宋真宗我朝至元己巳龜蛇見于高梁河
以為玄武之祥為築昭應宮於是武當之山若增而高矣是宮之
名雖主玄帝而巍然高而朝五帝者寔主玉皇玄帝五帝之一也
若夫北方七宿為水之神寓形龜蛇者世飲聞矣主之大者蓋聖
厥旨玉皇礼家所謂昊天上帝也以形體言謂之天以主宰謂之
帝以功用謂之鬼以妙用謂之神主宰者不離乎功用而能妙用
者也日月之運行風雷之鼓舞山川之流峙人物之生息皆功用
之著者闔且闢于斯往且來於斯視之而不見聽之而不聞則有
妙用存焉先王之有天下也以為萬物本乎天故祀帝於郊園坵
以体其形蒼璧以象其色樂九變以著其數猶曰維天其右之其

之為言不敢少之辭也不特此也群祀亦然或求諸陰或求諸陽不可方所徵形狀索也自神僊好樓居之說行遂有作崇台傑觀以俟之者嵩呼之間巨跡之見真若可以形聲相接而像設盪觴於此矣其始也施之群祀其卒也于上帝亦冠裳而宮室之矣聖人以神道設教上智昭昭無幽不通下愚蚩蚩既頌而蒙孰為民彛孰為帝衷可使由之而不能使之知也今號於衆曰帝以主宰言其不啞然笑者幾希孰與樹中天之華構揭上帝之高居使瞻而仰之者舉首加額曰上帝臨汝無貳尔心由是而舍惡從善之心油然而生矣是宮之建顯命靈躅祝釐民者固自有在而使民觀感日遷于善聖教之助不又多矣乎銘曰

岷江東涘郛城西壁疊嶽嶸嶸崇宮屹屹天闕失守仄飛瞬息剝屑碩果復根定力噓蜃倏樓琢璇俄室三華屹岿九光赫奕雕梁龍矯文瓦鱗集棟吻雄鼈闌腰鳴霓踈標綺結飛簷翠温碧霞騰虛流雲洞闢屏翳擁幢豐隆列戟桂漿醴素蕙肴蒸碧靈霜清屬廣樂翕繹瑤草肥露玉華酣日紫芝已甲蟠飛行寔祥鸞朝朝瑞麟夕夕玄龜左顧靈蛇右翼山川開即神人愉擇物其阜康世允寧謐玉帛神休永奠人極

伊尹二程祠碑

嵩古伊川郡隋唐為伊陽縣我元仍金為州至順庚午知州李德恭即縣舊治西偏建義學因地伊州祠二程夫子後至元庚辰幕官鄭文曾以祠卑隘又以伊尹之伊蓋原于是謀諸守倅擴一祠合祀而倅州張弘贊之獨力當縣治中為堂三楹中像伊尹左右列二程工未迄者歲壬午判官李禎收功焉翰林待制吳炳榜曰伊尹二程之祠弘請記其故于石夫聖賢廟祀當通祀者人不得而

專也當專祀者人不得而通也通以道言專以地言若夫位不同時復不同合而祀之亦有說乎道同也地復同也則位與時在所以不論已上古聖神繼天立極道統之垂尚矣堯舜禹湯文武以君兼師而接道統者也周公位雖隆威臣也孔孟又位不及周公至于道統之接則均焉周公而前以道自任者伊尹爾處獻畝之中樂克舜之道既而幡然任天下之重以斯道覺斯民一旦相湯伐夏救民任道行道與周公等韓愈氏原道言周公而不及伊尹何哉不獨伊尹也若皋陶傳召之為臣皆接夫道統之傳者而皆不及之蓋歷序往聖昂于其君爾孟子後千四百年而有程夫子出得不傳之學于遺經辨異端闢邪說使聖人之道煥然復明于世孟子之後一人而已是雖叔子序伯子之言而叔子之道不異也兩夫子者有以接乎孟氏之傳所以繼往聖開來學其功又不

在伊尹之下者焉禹稷顏子跡至不同孟子以為同道况伊尹二程道既同矣時復偶同則合祀一室禮亦宜哉學者希賢希聖行道而使天下被其澤守道而使後世有所述孟子曰近聖人之居若此其甚也是祀不獨崇祀而已焉

有元故中奉大夫陝西諸道行御史台侍御史宋公墓志
銘

至正庚寅九月十七日己巳侍御史宋公薨於滑之里弟子訥走俾致辭曰先公將屬續遺筆曰吾身後當求銘于安陽許公公寔知我慎無以他人為封有日訥不敢違次敢以狀請昔公嘗戒識者徵文不果為至啟手足猶惓惓於愚愚惟知生者弔知死者傷弔傷皆致命辭公父子雖不一接而皆知之銘不百倍致命辭乎公諱崇祿字壽卿其先由衛山陽徙滑白馬縣未寧鄉中東保林

子里先莹在宋胡寨世不可考改卜里西原為永寧阡曾大父諱
殷妣張氏而上皆塋舊莹大父諱德仁累贈嘉議大夫礼部尚書
妣孫氏追封京兆郡夫人始塋新阡父諱宣累贈中奉大夫河南
行省叅知政事護軍京兆郡公妣孟氏封京兆郡夫人公甫冠入
京為故相康軍國左丞何聰山器重掾中書除同知樂平州事也
境事難决者行省悉屬公復松江豪民曹孟炎瞿陶等匿田租四
萬五千餘石錢三萬餘貫活常州飢民二萬餘戶正饒之貪民代
大姓輸納之苦調處州路推官甫閱月决囚數百平反陳明六曾
崇三之寃擢江淞省都事歲早疫死者殆半公檄八閩預收監課
勸誘疑者得米三十八萬餘石以賑入為戶部主事升員外郎節
濫賞斥冗食言生財裕國之道樽節金穀以百萬計時議汰冗員
公方自以冗辭中台奏為都事屬省部事稽滯無筭台奏遣御史

檢治柄臣不悅因中傷公既直前在復職以親老辭擢燕南廣訪
副使有文綺之賜罷監縣之巧斂者一郡守之不法者二出清州
民張仔等四十餘戶之產于僧寺言斷事官之錄囚失宜蒸收之
敗礼傷化時論避之災異封事言尤剴切遷潭州路總管三月决
滯訟九百餘事用刑尤慎若保定黑驢之盜糧父白於吏潭州蔡
千一之殺牛妻出其皮律同自首公皆釋之改都漕運使潭民詣
闕請留者三十餘人拜江南行台治書侍御史改山南道廣訪使
威令行以親老歸除戶部尚書不起親喪毀瘠踰制作新莹立世
德碑塋宗族貧不舉者十四喪服除除廣使四川復改江西皆以
疾辭獻中言時政七事閔陝旱荒起為西台治書侍御史賜金
緡以罷其行言荒政七事進中奉大夫侍御史時方限吏銓衡乏
人請展吏至三品以通滯才未幾力請休致台臣奏給半俸分給

宗族及凶喪貧乏者年八十五言民瘼十事蓋未嘗愆于世也疏
封及親立石先塋構亭曰介壽日閱載籍事可法者手抄成帙纂
東郡志十六卷紀史奇蹟十五卷出師表附錄二卷公私宴會不
造婚姻喪塋風雨必往肅賓客終日不倦教子孫以孝廉節儉勤
學睦親未病以所愛杖散親友塋之前二日取家傳歷履手自刪
定付訥疾革櫛髮整衣端坐而逝享年八十有八是年十一月二
十一日壬申祔永寧阡娶張氏追封京兆郡夫人生子謙世賞累
官奉訓大夫上都萬億庫提舉先公卒繼張氏封京兆郡夫人生
訥國子生戊子會試終場臨州儒學正女二人長適邢台縣尹李
熙能盡婦道次適李寧早寡守節養姑孫男五人孝祖大名府史
希祖領鄉貢南樂教諭彰祖廕太常禮儀院檢討衍祖鄉貢進士
復祖甫冠女三人一有從餘在室曾孫男女各二皆幼共範五福

一曰壽言有壽而後能享諸福也有廩祿為富無患難為康寧樂
其道為攸好德順受其正為考終命自丞孫相掾踐履中外至第二
品中間退居者十三年懸車後又一十年優游鄉里著述自娛廩
祿終其身壽墳期願蓋五福之備者也而追崇前人孫曾繩繩又
有出于五福之外者已銘曰

浩浩昊天仁覆閔下俟于戩穀獨斬弗假翼而兩足角而去齒在
理惟恒亦任厥委盈天地間總總而蠕有賤有殍有天有鮮伊得
其備百萬而一天豈而私天寔而德質令有人籍甚東郡根以天
資濟以學問貳郡佐幕作牧持桌裕財濟飢獄寃以雪白頭歛畝
敢忘帝力知無不言言無不悉校其忠蓋不問仕已乃知在官當
行肯止懸車養恬恂恂鄉閭春誦夏絃左圖右書天祚其誠壽幾
其頤鄉為矜式士有質疑有亭翼然人去亭存藏萬卷書遺尔子

孫書回公遺蓋求公心我銘不浮公頌尔箴

故處士劉君墓志銘

諸生劉瓚昔從予政府蓋歆蛇齊民而顯其親也俄以親老辭歸其父處士卒拜而泣曰瓚不仕無以顯其親志吾親之善使不泯獨非顯乎且瓚身自執事而後行故敢以凶服請予聞而悲之按鄉貢進士張冕狀處士諱士亨字希賢世居安陽孫平里祖父諱聖配李氏父諱成配曰張曰李曰張曰程五子處士出李氏次特聚光祖尚純處士矻矻力田父母年八十夙與必先省問而後治事未冠任家事衣食糲引洹水溉田樹畜以滋歲入視舊倍蓰重然諾慎取與貸人不急徵遇親戚子弟必教以孝弟勤儉年踰耳順始構亭植竹為娛老計密迓城市未嘗輕入孫平田多膏腴視它里直十倍歲時歌鼓嬉游習俗好侈處士深自推抑不為所移

子弟有衣華服見者駭曰吾家素質何用此伏枕彌曰衣者惧弃其衣始與語集賢檄為孝節處士至正庚寅八月十四日卒壽六十有四娶朱氏先卒繼娶趙氏子四長瓚也次璋瓊璣皆讀書女三適張吳郭孫男三尚幼是年十一月庚申塋孫平里新塋嗚呼世俗歆顯其親者不過以仕孝子仁人之心不在是也修其天爵人爵從之顯在其中矣不量己力遺親遠出微一命而卒不可得雖或得之而父母之產為之蕩然瓚惻然歸養恬愉以終其天年人道得矣瓚之得此處士之訓有素也銘曰
力足以力事而獨施於田善足以淑人而獨及其子不事不人是為處士編氓蚩蚩何敢與莛矧茲有託處士不死

至正集卷第六十四

元翰林承旨集賢大學士文忠魯國公許有壬著

碑志 丑首

先太夫人歸祔志 生乙丑年

先太夫人姓高氏世家彰德祖諱木刺監衛輝路考諱宗承事郎
萬寧縣尹太夫人幼淑懿祖妣王夫人愛過其女擇配極慎乃歸
先尚書公家故饒田畜而我素貧安若習焉事姑宗夫人以孝聞
周睦姻党舉無間言先公為小官問閨世途寔多內助同官家芬
華相矜獨罄簪珥延師買書嘗曰吾教子苟成當富彼百倍人但
勵志安貧瀆貨其效應後自見也先公好客究力營給有佳飲食
必蓄以待平生不私一錢間親識有私藏者謂子女曰財出夫子
私將焉用此態世多我不能為汝曹當戒也子女雖愛教不姑息

故女克敬戒子不至辱其先者慈訓有素焉長子有恒治生于外
太夫人終於內先公居家手不釋書迄終身無纖累一妹適集賢
直學士狄文忠南北間閩語及輒流涕曰為有恒娶其女尤好施
予遠近姻族或養于家或資以生里巷病窶猶拯焚溺故舊有喪
飲食為廢後有聞率不敢告見人憂患汲汲督諸子營救咸獲小
過必揜衣履瑣屑每躬為之諸子止之曰彼亦人也吾以此消日
尔其仁厚慈恕蓋出誠性至於女工精敏又諸族所希見有壬為
兩台御史封恭人湯陰縣君左司員外郎進高陽郡君兩淮轉運
使加高陽郡太夫人至順二年五月廿六日棄代于揚州壽六十
有七嗚呼天子乃至是乎有壬始官南北雖不在側而改官加封
報不間歲尊慈殊慰以為酬昔言矣承乏詹事中議轉左司員外
郎右司郎中又移左司皆在側也侍先公終正寢襄事居鄂服除

有恒忽去世季有孚入會試而有壬迫赴淮漕叔有儀奔經筵檢
討獨任家事尊意慈百口累不肯出有孚登第歸居家待次乃甚
喜有出意即迎至揚有儀從焉有壬召叅議中書省事具舟將北
太夫人鍾愛幼女擇歸有日臧獲病者十人乃語有壬曰汝妹事
吾寤寐在念北則迂矣且病者留之誰托挈之舟隘暑蒸此幸屋
大宜夏有儀又善事我汝當扈從上京京師屋難得汝先往求之
別不兩月妹事畢病者復計我至京扈從適歸事當兩濟况使來
三月不亟行恐巨測時往還諸公亦旦夕從使者聒聒相勉謂堂
上起居康勝處事明當而有壬冒榮不孝遂輕信焉去才四十五
日而訃音達上京矣嗚呼天子果至是乎昔南台同官言親年逾
七十無兼丁溺官榮違奉養者可禁指其隣有任江西父病念其
子而殞者有壬時同省署為訖謂一旦身當之邪呼天不聞呼地

不知知是而懲而卒罹之豈非冒榮之過邁此大罰乎棺槨衣衾雖有儀能盡美而有壬為子病不得嘗藥終不得視舉尚名為人邪古人謂勿之有悔如有壬之悔非死不能已也有壬及事祖妣夫人獲奉考終後廿年父兄繼失荼毒雖極而夙夜堂上身心有屬今仰而望之無一人在上矣追念配德寔四十五年生五子二女有恒大理軍民總管府知事繩繩天長女適編官趙彝將同入京先廿五日卒病其基此乎幼安貞將歸人者後廿四日卒天禍我家何其酷也孫男二寶山燕山女四明年五月十六日祔安陽武官原先公之墓初太夫人妣武氏若外祖考諱清外祖妣石氏皆老吾家萬寧公無子沒海南求其柩歸俱塋江夏治命當反鄉里謹奉而襄事焉敢述先德且声不孝之罪傳為子孫戒焉嗚呼痛哉天地有窮而此恨無窮也

七兄大理知事公志

公生于乙酉年四月十六日甲寅時

公諱有恒字可人彰德湯陰人曾祖諱信祖諱毅贈亞中大夫彰德路總管輕車都尉高陽郡侯祖妣宋氏高陽郡夫人考諱熙載從事郎會福院照磨兼管勾承發架閣庫贈嘉議大夫礼部尚書上輕車都尉高陽郡侯妣高氏封高陽郡太夫人先公為貧仕祿入甚微廉淡樂道不知治生公幼從至鄂種學緝文通蒙古書未冠即奮勵任家事稱貸備廢居備水陸艱苦當途薦茂材除太寧路學正擢大理路軍民總管府知事驛符偕勅至公謂遠出不能為榮不若治生以為養也由是不復留意於声名矣先公之喪哀毀踰礼去大祥二日卒于鄂天歷己巳二月二日也疾革曰我才四十五數何短也事母再一二十年不為多也今不得事母矣嗚呼痛哉先公年甫強仕即得公力遂斷家事每當赴調公輒代行

山川崎嶇旒食蕭索不知也佐湖廣省理幕再至鄂公習風土便
薪米因苜居焉有壬應舉歷官奔走無寧歲仰事之重非公不能
出也先塋襄事侍太夫人居鄂困庾之積鮭菜之微莫不有備已
已庚午之荒一門老幼賴以無餒公氣和而中剛斟酌世故曲折
詳盡儉于自奉而豐于親朋早夜克勤內外秩秩娶李氏先卒一
女小茶靜慧絕異繼狄氏集賢直學士文忠女無子先公嘗令養
弟有儀子寶山公既卒太夫人遂命後之初有壬登第季有孚方
學公曰汝能繼兄當作雙桂堂有孚果登至順庚午上第有壬為
兩淮轉運使遂參議中書省事加恩二代皆公之願惜不及見也
我彰德公自穎來相積善未享先公太夫人承以碩德乃五子二
女公其長也在親左右之日校有壬為多古人生願為兄之意蓋
有契焉願奔走四方廢溫清定省萬鍾千駟果何有哉公之遂此
天厚之也然以孝友天至而不終于職使太夫人高年反服又若
天之甚薄者天可問乎使公壽考則一門老幼可坐而無慮吾兄
弟放浪四方可無內顧之憂而公之所以成就者可勝言哉公為
子而能子齊家而家齊視食焉忘人之事者有間矣人之生世不
獨官可行志也天降酷罰太夫人奄逝以至順三年五月十六日
祔安陽武官原先塋公從焉惧其善之泯也忍痛輟泣而志之蓋
至哀不復文也

七妹趙宜人志 丙申

泰定丁卯二月先公尚書府君諱熙載損館京師既祔先塋太夫
人高氏視諸孤居鄂是歲十二月妹宜人諱巽貞從其良人翰林
國史院編修官趙彞自洪州來吊彞官京師宜人疾作不能亟歸
有壬為轉運使揚州太夫人篤於愛母子不能離且有壬室未

有繼年高目力不洞妍媸且人亦謂我溷兄久願擇嫂以報至頃
卒未遂俱至揚成得卜趙門趙居金陵侍太夫人得畢其願焉未
幾邁疾五月一日卒于揚州年卅有六有壬暨弟有儀輟哀治事
棺槨之美衣食之備傾城府官吏士民哀送儀衛之盛太夫人見
之割不可忍之愛而亦為之稍釋焉惟許氏為穎著姓大父彰德
府君諱毅始徙湯陰淳德起家先公仁孝太夫人懿德克生賢女
而我祖妣高陽郡夫人宋氏柔靜淳淑貞節著聞宜人及事之起
卧與俱故性行尤相類幼不游戲未笄尊輝衣履皆出其手先公
太夫人在撫州更病獨宜人與弟有孚侍勞苦備至迄平復始解
帶既歸趙太夫人如失左右手事姑安陽郡太君得懽心其容我
也念違養不釋口質簪珥為貨以寄寒暑履物不絕待介婦有禮
視前室子誥誥自幼及冠人不知為異出趙族大口象老威獲尤

難御稱無異辭先公以宜人質美輯女教書授之宜人為婦為妻
為母舉無悖也彝官七品得封宜人今名曰起官日大宜人且均
其榮而一旦先逝天之忍乃若是耶一子絲絲寔生我家得奇疾
太夫人屏絕家事盡瘁保育幸愈而健有壬罪大惡稔太夫人暨
幼妹相繼傾逝逾月彝至哭曰相我者世不復可得矣太夫人嘗
子我我制雖總心不總也同舟至九江以神主暨二子去嗚呼痛
哉命果至是耶抑醫藥之誤邪將金陵之行觸新暑疲起居以致
疾耶兄不能盡友愛而乃以移禍吾妹耶窮天地亘古今之恨萃
于一身矣明年 月 日塋安陽原從其先塋彝請志之嗚呼予
尚忍志予妹也夫沈痛隕絕書其槩而刻之

七室高陽郡夫人趙氏志 丙申七月一日生

七妻趙氏諱定平樂亭人其先在金累世擢科號進士趙家曰克

者登大定廿五年第終盧龍縣尹子震至寧間及第蔚州軍判軍判之孫蕙善侗悅不羈日本之役諸兄為省僚慨然從行大風舟敗冒白刃救兄出掾憲司行省與長官齟齬輒棄去為景州教授而卒嘗曰吾力學為校職使人稱先生是不墜先業志願畢矣介直嗜酒嫉佞若仇故所遇不合娶戴氏生夫人端靜柔懿舉族異之嘗有象過門鄉隣空屋蔽垣諸女即僵走邀看夫人才十三竟不一出時大家以詩禮名者聞之為其子求婚先生曰吾與世偃蹇栖栖獨三女而此女最賢且術者言當郡國封若世雖大若子未可知也其家患而謝之有士未昏走四方辟山北憲憲使庸齋劉公有人倫鑑與先生厚一日招飲賀曰府尊屢書為君擇昏君之昏未易擇也今真得矣母憚不告此寔府尊意不可失而此昏尤不可失也先生亦欣然曰吾得婿矣况庸齋媒世無有也好舍

言遂合皇慶癸酉五月乃歸于我每以未見舅姑為恨南台觀省有曰而督召復北夫人至垂泣真意有不可捨者先公太夫人入京始得行婦禮女工復盡巧織太夫人稱善事為平居服澣補弊一縷不自用時有賜給悉留以獻先公之喪夫人力疾蒞事送厝所十里不車幾斃為歲時祭祀寢食必廢主饋未嘗以涓粒其私子視予妹如兄弟溘珥有需傾委不靳與娣如居無間言入吾耳封始恭人當進縣君皆以讓吾祖妣宗夫人夫人素多疾天歷二年九月十七日卒于鄂年三十有四太夫人如夫愛女有士為服齊衰期為初先公既棄諸孤幼妹未有家夫人誓言當盡簪珥奉之以養姑志以恤其無父勿使人謂兄不如父也嗚呼斯言丁壺猶在吾耳也夫人孝慈敬勤且享福祉而壽乃止此耶歸九十七年未嘗遠相離惟應舉來江南涉十月為最久相從歷九官山川

政涉貧乏辛苦每同烏官任雖劇俸薄食衆夫人衣飾每不給未嘗少動于心予為轉運使祿入稍優而夫人不及見矣夫人生失五子一女卒後又失一子予年將半百憂患纏繞夫人有以我之心為何如哉一子燕山能讀書矣女順茶姆謹視之繼夫人趙氏子之如己子夫人可無憾矣至順二年六月追封高陽郡夫人明年月日塋安陽武官原從先塋禮也為之志曰
惟性于貞胡嗇以齡兮惟孝于姑乃貽以荼兮其儀可母子弗覩兮拮据成室不同適兮佳城埋玉夢則髣髴兮日存耳言終不可緩兮

擬毀壁 己酉

女弟諱安貞生戊申十二月廿九日幼多疾太夫人高氏疲心殫力調護有成為人寡言咲坐終日不見喜愠食飲美惡早晏自幼

不經口先尚書公訓以女教警悟強記遂通其說又能楷書組繡裳衣各致其美見諸嫂理家即善握筭父兄祿入悉付之出內無毫髮失慈訓日益惟習俱至故女德近備焉生最晚太夫人尤篤愛至順辛未春在揚州卜擇始諧柔日將屆而趙氏姊卒太夫人得遽見棄妹素孝敬值此荐凶哭出輒殞時又大疫遂成疾十日而卒六月廿日也明年五月十六日塋安陽武官原先塋昔黃太史為女弟賦毀壁因抒其意以極吾哀以志其墓焉玉在石兮多瑕得維瑜兮成復嘉可聘享兮祀天弗一試兮胡毀旃齊美兮世艱女懿兮亦然撫育兮既堅姆傳兮既賢歸之易兮才違擇之過兮後時嗟嗟父母兮終始難之厥施不爽兮誰復取而孝敬有素兮母姊何辭時雖不疫兮亦將自摧侍膳在室兮奩儀夙備留之益傷兮棄復無地江之水兮東流淮之山兮幽幽旂鴈嗷嗷兮窮

孩啾啾汝來何愉兮汝去何尤涇之水兮先塋相之土兮先里汝
窶有位兮父母孔迨不婦於人兮終女於家是亦汝志兮我徒尔
嗟瓊月露兮與汝俱潔汝兄泊盡兮哭汝以血

至正集卷第六十五

元翰林承旨集賢大學士文忠魯國公許有壬著

說十首

蘭亭芳字說

冠而有字字依乎名禮也我朝肇造渾厚真淳之氣粹然古初名
且強贅况字乎語隆治首唐虞舉夔稷契有字乎有不傳子臆
說知其無也然則字之與也其亦淳之清而文之盛乎我太祖皇
帝聞周孔教而基文運太宗分四隊教子弟而一文教世祖立胄
館廣學校而盛文治百年來薰陶淪浹氣習不能不變也名而又
字宜哉昔兩承乏御史同人同官者或未字同官必相與加之否
則皆若有缺然者文治之漸溥矣乎而夏圃蘭蹊蚤以通才歷華
貫擢湖廣行省正印行台監察御史篤列圖敬夫擬其名蘭以氏

之推蘭之德曰庭芳以字之微予說以自淑為卉之嘉而清者惟
蘭見於百家詳于離騷而又以芳稱入其室久而知其芳者見其
蓄也漸之則芳者示其益也不為不服而不芳者守其恒也變而
不芳者憂其至是以託與君子之不遭也其曰庭者則謝康駟謂
芝蘭玉樹生庭堦義烏士君子道德植于身教令行于家而後功
業及于天下傳于後世不但一家一時而已也蓋吾之誠極吾之
力于吾所當為名之間不聞不恤也况寔之所在名固從之則字
尊于名矣夫僖人之爵當得為之時而或一毫未盡則字之為飾
古人不我誣矣且天地之間義理無窮人之為學造詣有限一藝
一善皆足以流芳一時一章一句皆足以資口給語其至則君子
病為庭其迹也芳其微也由迹而遠由微而著其亦培其根以遂
其寔乎公羊氏謂名不如字其在吾庭芳矣

洪中南字說

番陽洪紹祖介其鄉人高本齋請曰紹祖之先由樂平徙餘干十
一世矣所居生聚蕃盛人名為洪方兵燬大父留畊主簿遷城北
嘗戒曰洪方祖基九傳至我且近先塋慎勿棄也先子西清教授
徙復安仁甫述事而沒惟祖訓不敢墜泰定甲子經葺始完遂歸
焉前池後阜松竹映帶居山之中而山之南因以中南代名願誨
不敏予聞而復之曰古人既名則加以字而字則取義于名聖人
以立名而字從之鯉之為魚回之為淵參而在輿由而在路若稽
載籍戾是者鮮若服祖訓力堂構紹祖名斯稱己而中南何居乎
山中之居因地為之不得已也吾又因而字之字名之賓也身之
章也豈好奇務新自同于山而以不同於人為美乎夫不同者山
也同者人也可同而可不同者理之所在也彼遊方之外哆然標

榜吾儒不取焉君世儒力學予重違其請取其中而略其南而後
有以告焉夫中主于不偏天理之極致也大如天地小至一室而
各有中君子修身止于至善之地也君其致力于此使處心行己
之際無一毫過不及之差或南或北不恤也苟為不然則自西自
東自南自北吾不知其稅駕之所矣所謂我知天下之中央燕之
北越之南則將合蒙莊惠施之喙且不能喻矣君其思之

彭宗建字說

斗天樞机也屈平叙名字攝提孟陬首言其貞廬陵彭季斗父既
名之師劉岳申以宗建字之其有取于斗乎孔子冠父宿戒賓冠
三加祝而字之字之則責以成人之道矣師猶賓也父師之道盡
矣成人之道則在宗建焉亦致思其義乎斗在天中酌斟元氣平
分四時自娠訾歷玄枵杓之所直生長收藏莫有戾者學者象之
根于心者明修于家者至大本既立以之齊家而家齊以之治國
而國治猶斗之建隨其所指周制各當而歲功成焉建之義章矣
宗建入京探其學知其為成人勉而擴之且至聖賢况其下事功
哉詩曰維北有斗不可以挹酒漿則非所望于宗建也

敬思永字說

西域生敬大父嘗持憲數道世賞在敬自以年未及學未克也曰
種學績文非儒生不交紉綺氣習濯剏殆盡予與其外舅和叔監
郡將時從過予俾賦詩每俄頃成且清麗不苟暇日請曰敬幸侍
下風不有擊其節使服膺以卒其業與不及門承教等耳昆季為
華學率以思冠其字先生幸字之予觀世之人習于近而不究其
遠狃于短而不求其長天下之通患也若世家子則此疾尤痼薰
染性成知飽暖而不知有飢寒知富貴而不知有貧賤目前之利

不知為身後之害一時之樂不知為百年之憂謂金幣可長有用之如泥沙謂權勢可長恃也挾之以驕縱年邁家替日暮途遠輕則飢寒之戚櫻其身重則傾覆之禍及其族雖跬步不能前矣蓋不知思永之過也書不云乎慎厥身修思永言身雖謹而所思者不永則亦淺近而已矣故必謹其所修審其所思為遠大悠久之計則學成而行立矣故從其昆季之以思為字也而以思永字之叙其槩若此俾思而有以自勗焉

丁慎之字說

中書總天下机務惟惺佐史之屬鱗次于其下譬為巨室棟梁柱石之大勝其任矣椳闈扂楔之細亦莫不各致其良不以細而易之也一或非良雖傾覆不職是而損敗之患馴及其大矣國制諸國之人各有部以總其族衛戍之餘又各入其人于中書中書祿

之秩視行人而又優其年老號玉典赤訖門以嚴省署從直以擁護宰臣備傳遽以宣布政命出官七品階是樹声名至達官者多矣予待罪中書分而當直殆徧其徒從予最久者西域札馬魯丁慎而寡言若詩書漸習之有素予得請歸沮斥馳傳過再拜請曰細人事公之日最多習公之言誘人使為善者非一竊有感焉世西域而生中國又得親公之教敢不思所以自勵者幸憫而訓之字得服以自勵則是事公于終身也予素愛其人不_言得乎凡今華其短裾飛其駟乘事上則為便嬖使外則如達貴視齊民如草芥_冠突撐觸謂人莫敢我復者滔滔也乃能斂其鋒銳求所以自勵者且服役几年所直凡官而獨有見于吾輩其可進也哉于是即其人之長字之曰慎之且語之曰若知慎之為義乎立身之要道乎慎于言而言無過慎于行而行無失無所往而不慎則無往

而不得其志不但官日盛名日著將見日進乎善而為成德之君子矣慎之其益慎之哉

名張碧說

襄垣張生質厚而氣青年甫二十負笈來游居三年餘人日刮目余將北乃再拜請曰小子侍有日未有以名惟古子命于父礼也民生于三義無二焉幸訓之名生敏者也猶器之利者焉遂以碧名之而以景韶字之且為之說曰士之立身行道齊家治國其本在學農之用時因利桔家富國其要在器故是之取而為生道焉耨鉏耨鉅皆有用于農而耜也獨見取者誠以發堅破塊俾播種有所施未有先于是者則是耜之器農也不亦重乎使其鈍不勝任將焉用哉詩所謂有略其耜者取其利也人之敏者亦然人矇已見人後已至業修德進乃亦有秋矣然而耜之利不用則無功

性之敏不勤則無成悠悠歲月一暴十寒恃已易能舉為不足學望而未見且謂已能猶惰農不昏作勞舍利耜而不用雖利何以哉故聖人謂孔文子所以為文者以其敏而能好學也况前輩言後生才性過人者不足畏惟讀書尋思推究者為可畏尔碧也不患其不學而患弗思也不患其不行而患或止也碧乎勉之

名元氏子說

君子不器以器待人予其戾哉器有受貴而切于用者有受賤而緩于用者人而至于休無不具用無不周則善茂加矣未至于是為器之受貴而切用者不亦可乎夫料所以受穀也人以食為天世之貴者復有加于是者予較多寡均出入大而太倉微而田家皆不能闕非切于用者乎惟人之身亦猶料也君子小人初無異為願所受何如尔寔之以道義文學猶料之有穀焉發而為忠孝

推而為事業猶舛之出穀以活世焉無以寔之是空舛尔若夫納之以異端邪說充之以私慾凶惡流而為荒唐出而為毒螫降衷均善甘迷厥初則是以舛而受冀穢曾械窬之不若也元君廷幹乞名其子予既以舛名之又為之說若是俾舛也知所擇云

余孝友政卿名字說

降衷根性匪由外鑠明善復初則有待于學焉古之君子惟是是力它不暇也惟名猶服身之章也君子慎之而所心不存焉賢而敬緼不害其正不肖而華不細其瑕丹耕曰牛匪嘉也而孔門稱德操以德字德有何哉然士之有志者因其名之嘉思有以稱則亦有益于學焉稱諸口書諸手惕然自警不愈于几杖盥孟之銘乎東魯余君名孝友字政卿居家不愧其名推而從政不愧其字其亦士之有志者乎他日君之子孫其毋以是為諱也諱之言力

之行勿使如退之者出舉名仁為人之說則又善矣

名馬氏三子說

予友馬明初請名其三子說明初名熙從火其考諱從木祖從水取五行終始相生之義次當從土故其名孟曰暨字以世完仲曰塾字以世修季曰壘字以世勤古子生父名二十冠則賓字之予不能拒而名之又為賓以字之乃為賓祝之辭祝之曰暨乎而伯子也世其家不在而哉則凡舉其廢者不力可乎塾世其儒壘世其業各有望于汝也家也儒也業也豈人各一事而已耶析而言之家貴以勞儒貴以學業戒其惰合而言之責以勞者不知儒與學乎責以學者不知業與家乎而戒其惰者不知家與學乎兄弟異体而同氣三人蓋一人也一人必兼三人事而三人必若一人之身則馬氏之後必大矣

名賈氏三子說

愚幼僑鄂知叅政庶泉賈公有大恩德于鄂人入京又知中書大
叅元播公雍容寬厚真公輔器詢其世叅政子也中書子彥弘為
安慶總管繼述有聞安慶之子曰棟字士隆今知陵州以愚悉其
世也請名其三子且曰吾父之諱從水木棟則從木之後義當從火蓋以五
行更生所生之行轉相承也字書訓燈為近火盛火生于木木盛
于春象其德為孝名孟以燈字以惟孝南方揚輝執衡司夏為礼
名仲以輝字以惟礼焜也者以火伸物也伸于資力力不自致有
志以帥之名季以焜字以惟志賈氏庶泉而下今五世矣上而四
世兩至宰執兩為郡守而仕隆年富膺仕所至籍甚前武未可涯
下則三子也其承亦重矣哉孝原百行燈必待孝礼首四維輝必
待礼有志事成焜必待志孝也礼也志也推是三者家有不昌世
有不齊其美者乎三者不力徒曰我門大宅不我敵則有柳先生
鐵爐步志可不惧哉愚于三子聞而知其高見而知其曾交而
知其祖若父故名之不辭而于取義也以規不以頌

科定
友証



